



Republika e Kosovës
Republika Kosova - Republic of Kosovo
Qeveria – Vlada – Government

**UDHËZIM ADMINISTRATIV (QRK) - NR. 03/2024 PËR
BASHKËPUNIMIN E STRUKTURAVE DHE MEKANIZMAVE
INSTITUCIONAL ME ORGANIZATAT JO QEVERITARE PËR
REALIZIMIN E POLITIKAVE PËR TË DREJTAT DHE OFRIMIN E
SHËRBIMEVE PËR MBROJTJEN E FËMIJËS¹**

¹ Udhëzim Administrativ (QRK) – Nr.03/2024 për Bashkëpunimin e Strukturave dhe Mekanizmave Institucional me Organizatat Jo Qeveritare për Realizimin e Politikave për të Drejtat dhe Ofrimin e Shërbimeve për Mbrojtjen e Fëmijës, është miratuar në mbledhjen e 203 të Qeverisë së Republikës së Kosovës, me vendim nr.08/203, të datës 08.05.2024.

Qeveria e Republikës së Kosovës,

Në mbështetje të Nenit 93 (4) të Kushtetutës së Republikës së Kosovës, duke u bazuar në nenin 9 (paragrafi 4) të Ligjit Nr. 06/L-084 për Mbrojtjen e Fëmijës, në pajtim me nenin 8 (paragrafi 4, nën paragrafi 4.5) të Ligjit Nr. 08/117 për Qeverinë e Republikës së Kosovës, si dhe nenin 19 paragrafi 6 (nënparagrafi 6.2) të Rregullores së Punës së Qeverisë Nr. 09/2011 (Gazeta Zyrtare, Nr.15, 12.09.2011),

Miraton:

UDHËZIM ADMINISTRATIV(QRK) - NR.03/2024 PËR BASHKËPUNIMIN E STRUKTURAVE DHE MEKANIZMAVE INSTITUCIONAL ME ORGANIZATAT JO QEVERTARE PËR REALIZIMIN E POLITIKAVE PËR TË DREJTAT DHE OFRIMIN E SHËRBIMEVE PËR MBROJTJEN E FËMIJËS

KAPITULLI I DISPOZITAT E PËRGJTHSHME

Neni 1 Qëllimi

Qëllimi i këtij Udhëzimi Administrativ është përcaktimi i bashkëpunimit të strukturave dhe mekanizmave institucional me organizatat joqeveritare për realizimin e politikave për të drejtat e fëmijës, si dhe për ofrimin e shërbimeve të nevojshme për mbrojtjen e tyre.

Neni 2 Fushëveprimi

Dispozitat e këtij Udhëzimi Administrativ zbatohen për strukturat dhe mekanizmat institucional në nivel qendror dhe lokal për të drejtat e fëmijës, si dhe organizatat joqeveritare për realizimin e politikave për të drejtat e fëmijës dhe ofrimin e shërbimeve për mbrojtjen e fëmijës.

Neni 3 Përkufizimet

Shprehjet e përdorura në këtë Udhëzim Administrativ kanë kuptimin e njëjtë me kuptimin e dhënë në Ligjin përkatës për Mbrojtjen e Fëmijës.

Neni 4

Parimet udhëheqëse

1. Bashkëpunimi i strukturave dhe mekanizmave institucional në nivel qendror dhe lokal me organizatat joqeveritare udhëhiqet nga parimet e proklamuar nga Konventa për të Drejtat e Fëmijës dhe nga Ligji përkatës për Mbrojtjen e Fëmijës.

2. Strukturat dhe mekanizmat institucional në nivel qendror dhe lokal dhe organizatat joqeveritare gjatë bashkëpunimit dhe bashkërendimit të veprimeve të tyre duhen të kenë parasysh dhe të zbatojnë me prioritet parimet e përcaktuara në Ligjin për Mbrojtjen e Fëmijës.

KAPITULLI II

REALIZIMI I POLITIKAVE PËR TË DREJTAT E FËMIJËS

Neni 5

Realizimi i politikave për të drejtat e fëmijës

Politikat për të drejtat e fëmijës si dhe ofrimi i shërbimeve të nevojshme për mbrojtjen e tyre realizohen përmes një procesi gjithëpërfshirës të strukturave dhe mekanizmave institucional në nivel qendror dhe lokal për të drejtat e fëmijës, organizatave joqeveritare, komunitetit, prindërve dhe fëmijës.

Neni 6

Planifikimi i politikave për realizimin e të drejtave të fëmijës

1. Strukturat dhe mekanizmat institucional dhe organizatat joqeveritare, komuniteti, prindërit dhe fëmijët bashkëpunojnë dhe koordinojnë veprimet për të planifikuar politika për realizimin e të drejtave të fëmijës.

2. Bashkëpunimi i strukturave institucionale në nivel qendror dhe lokal dhe organizatave joqeveritare bëhet përmes bashkërendimit të veprimeve dhe aktiviteteve për hartimin dhe zbatimin e politikave për realizimin e të drejtave të fëmijës.

Neni 7

Programi për realizimin e politikave për të drejtat e fëmijës

1. Programi për realizimin e të drejtave të fëmijës përfshinë, por pa u kufizuar veprimet për:

1.1. parandalimin e rrezikut për jetën dhe mirëqenien e fëmijës;

1.2. mbrojtjen sociale dhe shëndetësore;

1.3. edukimin dhe arsimimin.

2. Strukturat dhe mekanizmat institucional në bashkëpunim edhe me organizatat joqeveritare sigurojnë zbatimin e politikave dhe programeve në realizimin e të drejtave të fëmijës.

Neni 8

Pjesëmarrja e fëmijës në hartimin e politikave për realizimin e të drejtave të fëmijës

1. Respektimi i të drejtave të fëmijës është detyrim kryesor për strukturat dhe mekanizmat institucional dhe organizatat joqeveritare që ofrojnë shërbime për mbrojtjen e fëmijës.

2. Në procesin e hartimit të politikave për realizimin e të drejtave të fëmijës marrin pjesë edhe fëmijët apo përfaqësuesit e tyre ligjor.

3. Pjesëmarrja e fëmijës në procesin e hartimit të politikave është vullnetare. Me rastin e pjesëmarrjes së fëmijës në këtë proces ofrohet siguria e nevojshme dhe respektohet privatësia e fëmijës në pajtim me legjislacionin në fuqi.

KAPITULLI III

OFRIMI I SHËRBIMEVE PËR MBROJTJEN E FËMIJËS

Neni 9

Shërbimet e nevojshme për mbrojtjen e fëmijës

1. Strukturat dhe mekanizmat institucional dhe organizatat jo qeveritare, bashkëpunojnë dhe koordinojnë veprimet për ofrimin e shërbimeve të nevojshme për mbrojtjen e fëmijës.

2. Shërbimet e nevojshme për mbrojtjen e fëmijës përfshijnë, por pa u kufizuar në:

1.1.shërbime shëndetësore;

1.2.mbrojtje dhe mirëqenie sociale;

1.3.edukim dhe arsimim;

1.4.drejtësi dhe siguri.

Neni 10

Fëmijët përfitues të shërbimeve të nevojshme për mbrojtje

Fëmijët në nevojë për mbrojtje janë përfitues të shërbimeve pa dallim dhe sipas parimit të gjithëpërfshirjes, integritimit dhe interesit më të mirë për fëmijën

KAPITULLI IV

BASHKËPUNIMI

Neni 11

Qëllimi i bashkëpunimit

Bashkëpunimi në mes të strukturave dhe mekanizmave institucional dhe organizatave joqeveritare synon të fuqizojë politikën për realizimin e të drejtave të fëmijës si dhe ofrimin e shërbimeve të nevojshme për fëmijën përmes mobilizimit dhe avokimit me akterët relevant, sigurimin e ndihmës dhe mbështetjes të nevojshme për fëmijët si dhe avancimin e programeve për mbrojtjen e fëmijës.

Neni 12

Format e bashkëpunimit

1. Strukturat dhe mekanizmat institucional dhe organizatat jo qeveritare bashkëpunimin dhe bashkërendimin e veprimeve dhe aktiviteteve për realizimin e politikave për të drejtat e fëmijës dhe ofrimin e shërbimeve për mbrojtjen e fëmijës mund të realizojnë përmes formave të ndryshme.
2. Në varësi të natyrës së bashkëpunimit, palët përcaktohen për formën e bashkëpunimit në pajtim me ligjin.
3. Bashkëpunimi midis subjekteve nga paragrafi 1 i këtij neni bazohet në qëllimin dhe objektivat e përbashkëta për realizimin e politikave për të drejtat dhe mbrojtjen e fëmijës, përfshirë të drejtat dhe detyrimet e palëve për përmbushjen e objektivave.
4. Për realizimin e politikave për të drejtat dhe ofrimin e shërbimeve për mbrojtjen e fëmijës, bashkëpunimi mund të krijohet për:
 - 4.1. shërbime sociale dhe shëndetësore;
 - 4.2. edukim dhe arsimim;
 - 4.3. drejtësi për fëmijë;
 - 4.4. shërbime multidisiplinare;
 - 4.5. aktivitete sportive dhe rekreative, dhe
 - 4.6. zhvillim profesional.

Neni 13
Roli i strukturave dhe mekanizmave institucional

1. Për realizimin e politikave për të drejtat dhe për ofrimin e shërbimeve të nevojshme për mbrojtjen e fëmijës, strukturat dhe mekanizmat institucional të nivelit qendror dhe lokal:

1.1. identifikojnë dhe vleresojnë nevojat për ofrimin e shërbimeve për mbrojtjen e fëmijës;

1.2. vendosin prioritetet për planifikimin dhe hartimin e politikave për shërbimet për mbrojtjen e fëmijës;

1.3. zbatojnë politika dhe programe për mbështetjen e fëmijës dhe atyre që kujdesen për fëmijën, me qëllim të sigurimit të mbrojtjes së fëmijës;

1.4. inkurajojnë bashkëpunimin me organizatat joqeveritare pa cënuar pavarësinë e tyre përmes një procesi transparent dhe të bazuar në kriteret konkurruese.

Neni 14
Roli i Organizatave Jo qeveritare

1. Roli i organizatave jo qeveritare për realizimin e politikave për të drejtat dhe ofrimin e shërbimeve për mbrojtjen e fëmijës, përfshinë:

1.1. përfaqësimin e interesave të përbashkëta për fëmijët në strukturat vendimarrëse;

1.2. përfaqësimin e pikëpamjeve të fëmijës dhe promovimin e të drejtave të fëmijës;

1.3. ngritjen e vetëdijës dhe avokimin për mbrojtjen e të drejtave të fëmijës;

1.4. bashkëpunimin me strukturat dhe mekanizmat institucional në nivel qendror dhe lokal për identifikimin, vlerësimin e nevojave dhe realizimin e politikave për të drejtat dhe ofrimin e shërbimeve për mbrojtjen e fëmijës në pajtim me legjislacionin përkatës në fuqi.

1.5. organizatat joqeveritare për realizimin e politikave për të drejtat dhe ofrimin e shërbimeve për mbrojtjen e fëmijës nga paragrafi 1 i këtij neni duhet të plotësojnë kushtet dhe kriteret e përcaktuara me legjislacionin përkatës në fuqi.

Neni 15
Dokumenti i politikës për mbrojtjen e fëmijës dhe kodi i mirësjelljes së Organizatave Jo Qeveritare

Organizatat Joqeveritare që ofrojnë shërbime për mbrojtjen e fëmijës miratojnë dokumentin e politikës për mbrojtjen e fëmijës dhe kodin e mirësjelljes në të cilat përcaktohen, masat dhe hapat që duhet të ndërmerren për parandalimin, raportimin, reagimin, mbrojtjen e fëmijës dhe vetëdijësimin, si dhe përgjegjësitë e ofruesit të shërbimeve për mbrojtjen e fëmijës.

Neni 16
Mbikëqyrja e zbatimit të marrëveshjeve të bashkëpunimit

1. Strukturat dhe mekanizmat institucional mbikëqyrin dhe auditojnë zbatimin e marrëveshjeve për ofrimin e shërbimeve për mbrojtjen e fëmijës, si dhe inspektojnë ofrimin e shërbimeve të përcaktuara me marrëveshje.

2. Organizata jo qeveritare, e cila nuk i ka përmbushur detyrimet sipas marrëveshjes së bashkëpunimit nuk mund të lidhë marrëveshje të tjera bashkëpunimi me strukturat dhe mekanizmat institucional të nivelit qendror dhe lokal.

Neni 17
Raportimi i organizatave joqeveritare

Organizatave jo qeveritare raportojnë në baza të rregullta për zbatimin e veprimeve konkrete në realizimin e objektivave të përcaktuara në marrëveshje me strukturat dhe mekanizmat institucional në nivel qendror dhe lokal.

Neni 18
Hyrja në fuqi

Ky Udhëzim Administrativ hyn në fuqi shtatë (7) ditë pas publikimit në Gazetën Zyrtare të Republikës së Kosovës.

Albin Kurti

Kryeministër i Republikës së Kosovës

10 maj 2024